

U novom zdanju Gazi Husrev-begove biblioteke Reis Kavazović primio predstavnike medija

Reisu-l-ulema Islamske zajednice u BiH Husein ef. Kavazović, u novom zdanju Gazi Husrev-begove biblioteke u starom dijelu Sarajeva, jučer je primio direktore i glavne urednike najvažnijih print i elektronskih medija u BiH. Reis je pojasnio kako je Islamska zajednica upravo predstavnicima medija, prije svih drugih, željela pokazati novu zgradu Gazi Husrev-begove biblioteke koja će, nakon službenog otvaranja narednog mjeseca, postati hram nauke i kulture.

Brojnim predstavnicima medija reis je kazao kako je prijemom u novoj zgradi Gazi Husrev-begove biblioteke želio promovirati otvorenost za saradnju s medijima i spremnost da prihvati svaku kritiku koja je izrečena na pristojan način, bez vrijeđanja i omalovažavanja.



Foto: DŽ. KRUESTORAC

“Ovo zdanje će Islamska zajednica predati našoj kulturnoj i naučnoj zajednici, studentima, nastavnicima i istraživačima, Univerzitetu, našem gradu, Kantonu i bosanskohercegovačkom društvu. U ovim prostorima je sada smještena jedna od najvećih biblioteka, s najvećom zbirkom orijentalnih rukopisa u jugoistočnoj Evropi u jednoj od najljepših savremenih zgrada ove

vrste”, kazao je reis Kavazović. Poručio je da će Biblioteka biti otvorena za sve ljude - ne samo za čitanje, istraživanje ili prevođenje knjiga već i za organiziranje okruglih stolova, konferencija i drugih naučnih i kulturnih manifestacija. Izgradnja novog zdanja Gazi Husrev-begove biblioteke trajala je skoro deset godina i koštala je više od osam miliona eura. Novac je osigurala država Katar.